

Papsturkunden in Frankreich. Band 5: Touraine, Anjou, Maine und Bretagne., Nr. 195

Lucius episcopus seruus seruorum Dei. Dilectis in Christo filiabus abbatissae et conuentui Fontis Ebraudi salutem et apostolicam benedictionem. Quanto salubrius regulari obseruantiae insudatis abnegantes impietatem et secularia desideria et de conuersatione uestra bona obmutescere imprudentium hominum ignorantiam facitis laudabiliora exempla ad alios transmittentes, tanto facilius precibus uestris annuimus et desideria, quae conueniunt rationi, efficacius debemus et uolumus exaudire. Hac itaque ratione inducti auctoritate apostolica constituimus, ut obeunte te nunc eiusdem loci abbatissa nulla ibi qualibet subreptionis astutia seu uiolentia praeponatur, nisi quam sorores communiter uel earum pars consilii sanioris secundum dominum et beati Benedicti regulam prouiderint eligendam. Ad haec praesentium auctoritate decernimus, ut nullus clericus uel laicus electioni faciendae ingerere se praesumat, nisi forte gratia consilii fuerit a capitulo inuitatus.